

IDOP NI UHUR NI NAIBATA

“Seng hutulak idop ni uhur ni Naibata, ai ambit adong hapintoron marhitei Titah, soya ma parmateri ni Kristus.”

Galatia 2:21

Ari Selasa tanggal 1 September 1903 i tengah dalan ma rombongan ni Pdt. Agust Theis laho manuju Pamatang Raya, topatni lang nibotoh tangkas atap sanggah i tao ope mardalan nahei ma antara ni Tiga Ras pakon Pamatang Raya. Tujuan ni sidea ai ma mamboan na tartulis bani Bibel termasuk ma homa ayatta sadari on. Iahapkon Apostel Paulus do buei ni idop ni uhur ni Naibata na bani sandiri, nab oi pasonang paruhuronni. Halani ai lang itulak, harugian banggal iahapkon anggo itulak idop ni uhur ni Naibata. Suang sonai do homa pangahap Pdt. Agust Theis, domma ijalo hinajenges ni idop ni uhur ni Naibata, halani ai lang itulak homa, tapi mintor ihagoluhkon, janah bertekad ia padashon secara langsung bani halak Simalungun.

Bani haganup jolma na ra manjalo idop ni uhur ni Naibata, lang ipaksahon, hatorangan do ibere, dob ai terserah hubanta, jaloonta atap lang. Sasintongni haganup jolma domma manjalo idop ni uhur Naibata secara umum misalni: manggoluh ia, marianan ia bani ianan na tinompa ni Naibata.

Na dimaksud ni Apostel Paulus arti ni idop ni uhur ni Naibata na bani ayat on ai ma Anak Jesus Kristus na isuruh-Ni hu dunia on. Lang itulak tapi ijalo do janah iihutkon ajaran-Ni, halani ai ma hapintoron na sasintongni. Anggo iparbandingkan hapintoran ni idop ni uhur ni Naibata (Jesus Kristus) lang adong hapintoron marhiteihon ni Titah. Ibere Naibata Titah ai ma sebagai hondor atap sormin, bani halak Israel na ijia. Sampai sonari dong do guna ni Titah on banta jolma, ai ma songon alat kontrol mamareksa diri sandiri. Hotop hita mardousa, anggo roh hita manrogop manolsoli dousanta hulobei ni Naibata marhitei tonggonta, boi hita ipapintor idop ni uhur ni Naibata.

Bani kenyataanni buei jolma on na so memanfaatkan idop ni uhur ni Naibata, pas songon buei niombah na so ra memanfaatkan panghopkopon ni orang tuani. Marbatas do panorang panjaloan idop ni uhur on, halani ai jalo hita ma sonari lape tarlambat. Dob ijalo hita mamahkon hita bani niombahta pakon bani hasomanta jolma, ulang imonopoli hita ase rap marulih hita bani idop ni uhur on age sanggah i tanoh on sonai age magira i hasonangan na sadokah ni dokahni.

Tonggo: *Ham Tuhan, hotop hanami lang sadar bahasa na tongtong do hape idop ni uhur-Mu bannami. On pe Tuhan, patubuh Ham ma hubagas paruhuronnam i pangarusion pasal hinabanggal ni idop ni uhur-Mu in ase hot hanami manggoluh ibagas panghopkopon ni Anak-Mu Jesus Tuhannami. Amen.*

HALELUYA NO. 188:1

1. Idop ni uhur ni Tuhan Jesus Kristus
holong ni atei ni Naibata
pakon parsaoan ni Tonduy
mangkasomani hita haganupan.

PAMILIHON NI NAIBATA

“Ai ipilih do hita ibagas la, sanggah lape itombei dunia on ase pansing hita anjaha lang panurakon i lobei-Ni, ibagas holong ni uhur.”

Epesus 1:4

Ari Rabu tanggal 2 September 1903 panorangni lang binotoh tangkas atap na jam piga, das ma rombongan ni Pdt. August Theis i Pematang Raya. Dobkonsi martomu mata ni ihan pakon mata ni doton, artini dear panriahan ni Pdt. Agust Theis pakon ni Raja Raya, jadi hot ma Pandita on marianan i Pamatang Raya. Domma ididah Pdt. August Theis on, panorangni ma maningon das Hata ni Naibata bani halak Simalungun, lang itunda tunda be. Ayat na parlobei humbani Buku Bibel na ibasahon Pandita on bani halak Simalungun ai ma Johanes 4:35. Halani ai tarpaksa ma kerja keras siboban hata ni Naibata, halani domma panorangni, tongka ma sabion, janah bolag do sisabion, hape otik do siparhorja. Mardingat sejarah on, gabe marolob-olob ma halak Simalungun, tarlobih tiap bulan September, halani pamilihon ni Naibata ibagas Kristus.

Rencanan ni Naibata bani pamilihon-Ni on, termasuk halak Simalungun ai do na nirealisasihon ni Pdt. August Theis bani panorang ijia. Dob honsi ipilih Naibata halak Simalungun ibagas Jesus Kristus, menyusul ma tugas pakon tanggung jawab sebagai na dob pinilih. Songon sada-sada halak na dob terpilih misalni: Pemimpin-pemimpin negara atap gereja maningon partanggungjawabkononni do arti ni pamilihon na bani ai i lobei-lobei ni na mamilihsi.

Sonai do homa hita, maningon partanggungjawabkononta do pamilihon na banta i lobei-lobei ni na mamilih hita ai ma Naibata. Lang tarbahen lang hotop hita homa lang pansing, halani ai porlu hita marulang hali homa papansingkong dirinta hu lobei-lobei ni Naibata marhiteihonni tonggonta hupartonggoan-partonggoan, parmingguan tarlobih marhorja Banggal Napansing. Sai sayur ma boi hita konsekuen mampartahankon pamilihon ni Naibata na banta.

Tonggo: *Ham Tuhan, ipuji ipasangap hanami goran-Mu Napansing in, halani dear ni layak-Mu, na dob parsimada hanami bani pamilihon-Mu. Na mangelek ma hanami hu Bamu ase pargogohi Ham ma hanami marhitei Tonduy-Mu gendo boi ipartanggungjawabkon hanami ronsi ujung ni goluhnami hot, tong ibagas pamilihan-Mu. Amen.*

HALELUYA NO. 223:1

1. Domma das bai hita on hata hagoluhan;
Na pasonang sai tongtong uhur pardousa on.
Anggo jinaloni in gabe na porsaya.
Bai Tuhanta Jesus in na mangusir dousa.

ANAK AMPA HASOMAN

“Ai anggo anak hita, dihut ma panean, panean bani Naibata, hasoman panean ni Kristus. Anggo hasoman-Ni hita manaron gabe hasoman-Ni ma homa hita ibagas hasangapon.”

Roma 8:17

“Anak” on ma jaminan atap syarat na gabe panean bani Naibata janah hasoman panean ni Kristus. Tontu anggo isobut anak, sedo na asal anak maksudni. Buei do na boi tangaron pasal anak. Bani surat ni Apostel Paulus hubani kuria Galatia, isobut do sonon: “Dua do anak ni si Abaraham, sada humbani jabolonna naboru anjaha na sada nari humbani boru merdeka ai.” Anjaha humbani boru merdeka on, tubuh ma anak bagah-bagah, nini “tapi nasiam sanina, anak bagah-bagah do nasiam ...”

Ibagas Bibel sandiri pe domma isobut paboa dong dua masam haanakon; na parlobei in ma anak bagah-bagah (humbani boru merdeka), tubuh mangihutkon Tonduy, anjaha na paduahon anak ni jabolon, tubuh mangihutkon daging. (Galatia 5: 29)

Hita nani anak na sonaha do? “Anak ni Naibata do hita nuan!” 1 Johanes 3:1: Na dob tubuh marhitei Pandidion Napansing. Anggo sonai do hape, domma gabe dihut hita panean bani Naibata. Anak na mangkarosuhkon horja na madear ni Naibata, na ra mangihutkon hata-Ni.

Sidingatonta in ma: Ai age pe domma anak ni Naibata hita, lang mararti tanpa sitaronon. Halani hasoman anjaha sanina ni Kristus hita, gabe boi do manaron. Hansa manaron sedo halani dunia on, tapi halani Kristus do. Janah pori pe masa sisonai ai lang pala habiaran. Ai hasoman ni Kristus do hita sonari das hu hasangapon-Ni.

Tonggo: *Ham Bapa, na roh do anak-Mu on hu Bamu! Jalo ham ma hanami ase boi dihut rap panean pakon Jesus Kristus Tuhannami. Amen.*

HALELUYA NO. 241:2-3

2. Malas do tong uhurhon
bani Jesus na bujur.
Pasirsirhon hagoluhan
bangku na i hamagouan;
Haganupan dousangkin,
sai isasap Jesuskin

3. Malas do tong uhurhon
ai parrupeu au tongon.
Bani arta na maharga
pinarbagah ni Tuhanta;
Bagai ganup na bujur in,
mangirikkon Jesus in.

MANGAMBILANKON JESUS KRISTUS

“Ai sedo dirinami iambilankon hanami, tapi Kristus Jesus, Tuhan in do, ia hanami juak-juak nasiam do halani Jesus.”

2 Korint 4:5

Domma ipilih Tuhan in, ase dihut hita gabe parambilan na laho padashon barita malas ni uhur na humbani Naibata hubani samah hita jolma. Itontuhon do homa ronsi isini barita na sihol sipatugahkon, in ma: Pasal Kristus Jesus Tuhan in. Hape gati do legan panangkap ni na manangihon, sonai homa age pangabei ni siparambilan.

Songon na onnga masa i kuria Korintus, sompat dong parbolah-bolahan bani kuria, anjaha akibatni dong ma homa tuduhan-tuduhan na bernada negatip. Bani keadaan na sonon barani do si Paulus mangkatahon: Sedo dirini i ambilankon, tapi Tuhan Jesus do. Marhitei na pararatkon ambilan na madear ijai ma ia pasangapkon Jesus anjaha mambere malas ni uhur na gok hubani hasoman jolma na porsaya.

Juak-juak do ia bani hasomanni atap kuria in, tapi sedo juak-juak na mangindahi hasangaponni sandiri. Ia, ai ma juak-juak na porsaya. Pangkorhon ni haporsayaonni gabe lang dong tarsahapkon pasal dirini sobali ni Jesus Kristus

Halani ai talup do gabe siusihan na dear in age hubanta. Dalan laho padaohkon hasedaon humbanta age i kuria in pe, ibagas na pasangapkon Tuhan Jesus, in ma anggo sirsir hita martoruh ni uhur. Ai anggo bani na porsaya, anjaha siambilankon Jesus Kristus, hasangapon do anggo boi ia mangidangi atap juak-juak ni hasomanni.

Tonggo : *Ham Tuhan Jesus Kristus, ajari janah pargogohi Ham ma hanami ase boi mangihutkon usihan na binahen-Mu. Ase ra hanami mangidangi hasomannami, anjaha atap aha pe ibahen hanami sihol ma pitah halani Ham. Amen.*

HALELUYA NO. 490:1-2

1. Sonang rapkon Jesus in,
rapkon Jesus tongtong,
rapkon Jesus tongtong,
Ia Panondang bai na golap in,
rap Jesus daoh biar ijin.
.: Baritahon Jesus in,
pakon hasintongan-Nin,
janah ulang mabiar ham ijin.

2. Sai ambilankon ma in,
ambilankon ma in,
ambilankon ma in,
Hasintongan-Ni sahapkon ma in
rap Jesus daoh biar ijin.
:: Ambilankon Jesus in
pakon ganup Hata-Nin,
janah ulang mabiar ham ijin.

SADIHA DOKAH NARI?

“Sadiha dokah nari, Ham Jahowa, halupahonon-Mu ahu lalab? Sadiha dokah nari ponopkonon-Mu bohi-Mu humbangku?”

Psalmen 13:2

Anggo na ihut-ihut hata ni par-Psalmen on pas do sahira na ra Naibata mangkalupahonjolma on, sonai homa pakon pamonopkon bohi-Ni humbanta. Tapi sasintongni lang ra Naibata mambahen na sonai ai. Ai porini iponopkon Naibata bohi-Ni sangkidop mata gelah domma lang tahan be hita. Iluarhon par-Psalmen on pe hata na sonai, halani borat pakon borit ni pangahapni do ai. On ma manggambarhon sitaronon na nialamanni.

Sada siusihan humbani na binahen ai, ai ma totap ia marondos bani Jahowa, seng mintor ipindahi hatengeran ni uhurni na legan. Ibotoh ope torang pitah Jahowa do na boi mangurupisi. Marhitei na sonai ai do gabe lihar panonggorni dompak Naibata, ijai ma use ibotoh, na idompakkon Naibata do tongtong bangsa-Ni porini seng ididah hita pangurupion ni Naibata dompak hita, sasintongni sedo halani na ihalupahon Naibata, atap na so idompakhon Naibata hita, tapi hita do na so mandompakhon-Si janah idompakhon hita na legan.

Bani panorang on, musim ni pesta olob-olob do banta. Paima roh ambilan na madear hu tongah-tongahta, niuhurta Naibata do na so mangkawahkon hita, hape hita do na so mangkawahkon Naibata, ai sisumbah-sumbahan do idompakhon hita. Domma pe i tongah-tongah ni bangsanta sapari siboban ambilan na madear in, lang mintor ijalo homa ai, pala do hira-hira dob onom tahun ase mamungkah dong na ra tardidi.

Patut ma tarimakasih janah marolob-olob hita dompak Naibata, ai seng ihalupahon hita janah lang iponopkon bohi-Ni dompak hita. Ipaluah janah jurupi do hita ganup panorang.

Tonggo: *Hotop hape Tuhan lang ididah hanami pangurupion-Mu pakon bohi-Mu, gabe ninuhur nami seng idingat Ham hanami. Tarimakasih ma Tuhan, ai marhitei Jesus Kristus ipaluah Ham do hanami. Amen.*

HALELUYA NO. 436:1-2

- | | |
|--|--|
| 1. Sadiha dokah nari Ham Naibatangku,
layur manipat ari sunsah do au.
Sadiha dokah nari paimaonku,
Pangkawah-Mu hubangku siholan au.
Ganup munsuhkin manidingi au,
ai seng adong na mangurupi au.
Kawahkon Ham ma ahu Ham Naibatangku,
ulang tarpunjung ahu hun lambung-Mu. | 2. Sadiha dokah nari Ham Naibatangku
munsuh pagijang diri mangodoh au.
Sai ihatahon bangku hagogohan ni,
sol bondutonni ahu ninuhur niin.
Idop uhur-Mu pangajamankin,
ai pitah Ham do haporusankin.
Urupi Ham ma ahu Ham Naibatangku,
Ase ganup munsuhku tunduk Bamu. |
|--|--|

GANTAR HAPORSAYAON

“Ambah ni ganupan in, jalo nasiam ma gantar haporsayaon in, ai tarintopi nasiam do marhitei in haganup panah apuy ni parjahat in.”

Epesus 6:16

Igorani sada negara gabe negara na maju dihut iukur marhitei kelengkapan sinjata ni sidea. Ase domu hujin ganup do negara age das hubani panorang on totap mangusahahon penemuan-penemuan sinjata na lobih mutakhir. Iporluhon kelengkapan sinjata tontu ihorhon kesadaran bahasa na adong munsuh.

Ise do nani munsuh ni haporsayaonta?

Tontu ganup na mangojur ronsi mangajari hita mangkorjahon horja na so harosuhni Tuhan, goranon ma ai munsuhni haporsayaonta. Munsuh ni haporsayaon lang daoh ai humbanta dihut do ia bani ganup langkah nai ge pingkiranta. Mawat-mawat anjaha pindah-pindah do ia arian age borngin laho mangindahi mangsa sibondutonni. Munsuh iman selalu mengintai hita. Aha do sinjata banta laho mandompakhon ganupan munsuh na roh manjumpakhon hita?

Bani Epesus 6 lengkap do ipaingkat Tuhanta hita marhitei sinjata partonduyon. Khusus marhitei ayat ombas on ibere balos bahasa sinjata sipakeionta aima gantar haporsayaon atap perisai iman. Gantar haporsayaon on sedo gorgaan ni jolma. Gantar haporsayaon justru sibere-bere ni Naibata. Pakon hata na legan Naibata do hape pangajamanta. Ia do pangurupi banta. Ambit lang iondoshon gantar haporsayaon ai banta, lalap ma hita gabe halak sitalu-talu. Mamparujahon gantar haporsayaon na humbani Naibata, gabe boi hita mangintopi sura-sura pakon sora ni parjahat. Ase pakei hita ma gantar haporsayaon na dob iondoshon Tuhan banta, ai in do sinjata na boi pakeionta laho mamorangi ganup munsuh ni haporsayaon bani pardalananni goluhta siganup ari.

Tonggo: *Domma iondoshon Ham gantar haporsayaon bannami Tuhan, pakeion nami ma in laho manlawan munsuh ronsi sura-surani sibolis i tengah-tongahni goluh nami. Amen.*

HALELUYA NO. 380:1-2

- | | |
|---|--|
| 1. Marhasoman Jesus,
marhasoman Jesus,
sai monang hita on
Marhasoman Jesus,
marhasoman Jesus,
taluh sibolis in.
Marhasoman Tuhan Jesus,
hita monang do tongtong.
Marhasoman Tuhan Jesus,
sai monang hita on. | 2. Anggo Tuhan Jesus
Anggo Tuhan Jesus
hasomankin tongtong
Ningon do maporus
Ningon do maporus
Sibolis munsuh in
Tuhan Jesus hasomanta
lao mangimbangi dousa in
Ase saud sonang hita,
ronsi sadokahnin. |
|---|--|

IPINTORI HALANI HAPORSAYAON

“Songon si Abraham: Porsaya do ia bani Naibata, jadi ai do ihira bani gabe hapintoranni.”

Galatia 3:6

Jumpah Apostel Paulus do pangarusion na salah pasal haluahon bani kuria Galatia panorang ai na mangkatahon: Haluahon atap hapintoron boi dapot jolma in marhitei na manghorjahon Titah. Halani ai ipagolpa Paulus do kuria ai bahasa idopni uhur ni Naibata do hansa na boi paluahkon jolma, janah haluahon atap hapintoron ai ijalo marhitei haporsayaon.

Iulgapkon Paulus do bahasa si Abraham pe ipintori Naibata halani haporsayaon do. Bani panorang hatuaonni si Abraham ibagahkon Naibata do sada anak bani marhitei parinangon si Sara. Secara usaha ni jolma atau medis mahol do manjalo ai halani domma matua sidea. Tapi pori ni pe lang tarjalo secara logika, Abraham yakin janah porsaya do bani idop ni uhur Naibata pakon bagah-bagah ia. Halani ai ipintori janah ipasu-pasu Naibata do si Abraham sedo halani gogoh atap horjani tapi halani haporsayaonni. I idopi Naibata do si Abraham marhitei partubuh ni si Ishak anakni ai. (1 Musa 15:6)

Keteladanan ni Abraham on ma na iojur Paulus gabe pedoman pakon sitiruon das age hubanta panorang on bahasa:

1. Lang boi pintor hita ilobei ni Naibata anggo marhitei gogoh atap pambahenanta. Tapi domma ipintori Kristus hita janah ipasirsir haluahonta asal ma porsaya hita hu Bani. Lang talup be maralasan hita halani hurang ni gogoh, bagei ni situasi na ihadapi mambahen tarolat hita marhaporsayaon bani Naibata.
2. Halani domma ibere hubanta arta na maharga aima haluahonta na lang tarbayar hita anggo marhitei gogohta sandiri, patut ma marringgas ni uhur hita mangkorjahon harosuh ni Naibata.
3. Pangkaporsayaonta bani hatani Naibata do homa gogoh pakon senjata banta mandalani ari-ari ni голуhta. Paluahkon haporsayaon bani menghadapi bagei ni na masa, sarupa ma ai songon na mangintopkon suluh bani dalan na golap sehingga targompang ujungni.
4. Marhitei situasi zaman pakon dunia logika, boi do suhar bani pingkiranta mambalosi pakon mangkaporsayai hatani Naibata. Tapi justru ijon do ningon ipataridahkon hita haporsayaon na tahan uji. Tenger ma uhurta lang tarbador halak na marhaporsayaon bani Naibata.

Ase akuhon hita ma: Arta siharganan banta aima marhaporsayaon bani Naibata, ai marhitei haporsayaon do hansa jumpah gogoh pakon haluahonta.

Tonggo: *Tarimakasih ma bamu Tuhan na dob paluahkon hanami, ajari Ham ma hanami ase totap marhaporsayaon hu Bamu. Amen.*

HALELUYA NO. 343:1+4

- | | |
|---|---|
| 1. Banggal tumang do holong-Mu,
pabayu goluhkon
na doyuk kahou magou au,
hape maluah do. | 4. Hujolom padan na toguh,
in ma Hata-Ni in,
ai Tuhan in do gogohkin,
na hot sadokah niin. |
|---|---|

KUASA

"Holong do uhur ni Bapa in bani Anak in, anjaha haganup do iondoshon hubagas tangan-Ni."

Johannes 3:35

Sangghah tardidi Jesus i Bah Jordan, tarboge i do sora hun langit na mangkatahon: "Ho do Anak haholongan-Ku, marosuh do uhur-Hu Bam" (Luk 4:22b). Memang, mahol tumang do jolma in mangarusi sonaha do hubunganni Naibata na i Nagori Atas pakon Jesus na i dunia on. Ai do ase pala roh sungkun-sungkunni Jesus hubani susian-Ni "Ia Ahu, ise do Ahu nini halak simbuei?" Marbagei-bagei do balosni pangurusionni jolma simbuei in. Tapi anggo si Petrus isaksihon do: "Kristus ni Naibata do Ham."

Halak Jahudi mahol do mangarusi holongni Naibata bani Jesus. Marhiteihonni pangarapan tradisi Agama Jahudi pasal Mesias na ipaima-ima, aima Mesias na gogoh anjaha na lang tartaluhon dunia on. Pengharapan Mesias ni Jahudi aima ibagas sura-sura na laho mandompakkon kuasa Kekaisaran Romawi, na boi mambahen harajaon duniawi Israel gabe harajaon na banggal na so boi tartaluhon. Irapkon parrohni Mesias bani perjuangan politik ni Bangsa Israel secara monarkhi. Bangsa Jahudi mangidah Jesus na hun Huta Nazaret, justru ibagas hagalekon, lang songon "Puanglima" na mamboan hu parporangan. Halak Jahudi mangidah Jesus lang ibagas kuasa pakon hagogohon, halani ternyata Jesus saud itangkap anjaha iparsilangkon. Halak Jahudi lang mangarusi sonaha kedudukan ni Jesus ilobeini Naibata, sonaha holong ni Naibata hubani Jesus. Mahol do Jahudi porsaya bani aha na hinatahon ni Jesus. "....sagala na dong Bangku na dong Bamu do in, anjaha na dong Bamu na dong Bangku do in." Age pe Ia matei tarsilang, sedo halani na lang holong uhurni Bapa in mangidah-Si, sedo halani hagalekon-Ni mandompakkon gogohni dunia on. Nini Jesus do hubani susian-Ni: "Tenger ma uhurnima, domma Hutaon dunia on."

Halak na porsaya mangkaholongi Tuhan Jesus. Halani ai marmalas ni uhur do na porsaya in mandalankon ajaranni Jesus, sedo halani na terpaksa, sedo halani peraturan atap pe hawajiban. Holong do na mangatasi sagala peraturan pakon hawajiban. Halak na porsaya lang mungkin be madabuh hubani sikap marungut ungut atap pe manuntut hubani Jesus.

Gati do halak Kristen kecewa bani goluhni. Mungkin halani kegagalan-kegagalan, naborit, hamiskinon materi pakon na legan. Porini pe hita kecewa bani goluh on, lang homa gabe kecewa mangidah Tuhan Jesus. Ibagas na kegagalan ni goluh on, ijai do homa hita mangkaholongi Jesus. Ibagas marhahurangan hita mangkaholongi Jesus. Dob ni Jesus mambere pasu-pasu hubanta halani domma haganup iondoshon Bapa in kuasa bani Anak in.

Tonggo: *Tuhan, ajari Ham ma hanami ase ibagas hagalekon pakon na marhahurangan, sirsir hanami mangkaholongi Ham. Amen.*

Haleluya No. 350: 1.

1. Holong na humbani Tuhan, na roh humbai Jesus in.
Sai totap do marsinondang, holong ni Tuhanta in.
Sai sondangkon ma holong-Ni das bai hagolapan in
Ase haganup pardousa ipaluah Naibata.

SURA-SURA

“On do malas ni uhurhu sibanggalan, ai ma, anggo hubogei marparlahou anakku ibagas hasintongan.”

3 Johannes 1:4

Ganup do jolma dong bei sura-sura ni uhurni. Anjaha sura-sura dua do ragamni, ai ma: Sura-sura na matei ampa sura-sura na manggoluh. Goranon do ai sura-sura na matei anggo:

- a. Lang ihorjahon, hansi pe mungkin do boi namin.
- b. Lang tardungdung, mungkin hinorhon ni: 1. Hurang habotohon, 2. Hurang pangabeihon (modal), 3. Hurang kesehatan, atap hatahonon ma, lang saimbang sura-sura ai hubani simada sura-sura ai sandiri.

Napaduahon, goranon ma ai sura-sura na manggoluh anggo sura-sura ai sandiri taridah bani pargoluhon ni simada sura-sura ai sandiri. Sura-sura ni uhur ni jolma sedo na roh humbani sibolis, tapi sibere-bere ni Naibata do ai bani jolma in. Halani ai marpala-pala do sibolis mandohori jolma in marhitei sura-surani. Sedo na laho pamateihon sura-sura ai maksud ni sibolis, gariada papodashon sura-sura ai marbanggal, tapi sedo tubuh hubani hadearon, hu hasamboron do domu hubani rencana ni sibolis, dobni gabe hamagouan ni jolma in sandiri.

Halani haganup jolma dong bei do sura-surani, halani ai ningon pangkei, ase sura-sura ai ulang gabe alat/ perkakas ni sibolis. Bani ayat na i atas in jumpah do sura-sura na hinatahon ni si Johannes, ai ma sura-sura, sihol ni uhur sibanggalan atap malas ni uhur na gok.

Boi do malas ni uhur na manongtong harta, pangkat, sangap? Balosni, lang. Ganupan in pitah parsatongkinan tumang do. Anggo sonai aha do maksud ni Johannes bani ayat on, sura-sura ni uhurni sihol ibagas malas ni uhur sibanggalan? Ai ma anggo anakni marparlahou ibagas hasintongan.

Mangihutkon Johannes 14:6, hasintongan in ma Jesus Kristus sandiri. Na mararti do ai, manggoluh ibagas hasintongan in ma manggoluh ibagas Jesus Kristus. Manggoluh ibagas Jesus Kristus berarti manggoluh sadokah ni dokahni.

Sedo sura-sura na matei sura-sura ni si Johannes on, tapi sura-sura na manggoluh do, halani ai marpambahenan, marhorja, marhoih-hoih do ia hinorhon ni na manggoluh sura-sura ai bani dirini. Halani ai hape, sura-sura na manggoluh ningon marantup malas ni uhur ampa paruntolon. Anggo lang sonai, goranon ma ai angan-angan.

Tonggo: *Marhitei hata-Mu, gabe ibotoh hanami tongtong marparlahou na sintong hanami, sonai ganup dakdanaknami, janah sadar homa dakdanaknami margoluh na sintong, ai in do hape malas ni uhur sibanggalan. Amen.*

HALELUYA NO. 58:1

1. Sada do hansa sura-surangku
bai ganup dunia on.
Seng anjai lang malas do uhurhu
anggo jumpah au ma on.

Sihol sai ingaton ni uhurhu
na binaen ni Jesus bai tonduyhu
sanggah pinorsan-Ni in
haganupan dousangkin.

SAI PORSAYA MA!

"Ai lang domma Huhatahon bam, idahonmu do hasangapon ni Naibata, anggo porsaya ho?"

Johannes 11:40

Habotohon do mangkorhon haporsayaon atap haporsayaon mangkorhon habotohon? Sungkun-sungkun na mangkorhon parsahapan do on, tarlobih bani jaman teknologi modern on. Buei do jolma na marpandirian, parlobei ibotoh ase ihaporsayai. Jadi manungkun ma lobei hita bani dirinta, parlobei botohanta do lobei tangkas ganup atap aha pe na laho sihorjahononta ase ilahoi hita? Anggo secara jujur hita marbalos pasti hatahononta ma, haporsayaon do bona ni gerak ni goluh na ilengkapi habotohan na dong bani jolma in. Contoh: Ahli-ahli roket angkasa luar, parlobei porsaya do sidea bani perhitungan-perhitungan na irumushon sidea ase berani sidea mambahen persoalan age pe biayani bajan tumang.

Jesus mangkatahon bani si Maria, ase ibuka kuburan ni si Lasarus. Aha balos ni si Maria? Ase ulang pala ibuka halani domma ompat ari si Lasarus ikubur. Domma pala busuk janah marbau. Aha do dasar ni si Maria marbalos dompak Jesus, ai ma ibagas na mambalosi Jesus. Ipakei si Maria habotohon sedo haporsayaon. Secara perhitungan ni jolma, memang aha ma gunani bukaon kuburan ai, ai domma busuk bangkei ni si Lasarus.

Lupa si Maria, ise na jongjong ilobeini, anjaha ise na mambere parentah ai bani. Na songon kopala barisan do si Maria on bani goluh ni hita jolma, ai gati jolma marbalos songon balos ni si Maria on, berdasarkan paretonganni ibagas na mambalosi Jesus porlunan ma horja on ase na hu Gereja in, ai anggo lang dong holi berehonon tong do lang mardalan horja horja i kuria in. Buei balos na sonon jumpah i tengah-tengah ni kuria in.

Tapi sonaha balos ni Jesus? Lang domma Huhatahon bam, idahonmu ma hasangapon ni Naibata anggo porsaya ho? Na palobeihon paretongan ni jolma marsampang bani Jesus, maila. Sonai iahapkon si Maria ijia, sonai do age sonari pakon ahapkonon ni jolma na roh. Tapi hape saguru bani Jesus do haganup.

Pingkiran na adong bani jolma, in pe sibere-bere ni Naibata do. Maksudni ase ipakei jolma in pingkiran na binere ni Naibata laho pasaudkon harosuh-Ni. Halani ai nington pataridahkon janah pasaud hita parentah-Ni. Anggo sonai partibal ni pingkiran na dong bani jolma in ipargunahon, idahonni ma hasangapon ni Naibata bani haganup horjani.

Tonggo: *Naibata Bapanami, Ham ma gogoh nami ase ibagas haporsayaon hanami manjalo ampa manghagoluhkon hata-Mu. Amen.*

HALELUYA NO. 142:4

4. Haporsayai ma Hata in,
ai in do haluahon.
Arapkon Tuhan Jesus in,
Daroh-Ni in ma jolom.

Age gok dousa uhurmin,
maluah do bahenon-Niin.
Tongon, tongon,
maluah baenon-Niin.

GOLUH SIIRIKKON JESUS

“Tapi anggo ho, torang ma uhurmu pasal haganup, tahan ibagas hasunsahan, dalankon horja parambilanon anjaha gok dalankon tugasmu.”

2 Timoteus 4:5

Marhitei ayat on, Apostel Paulus manuntut tolu hal pokok na maningon dong bani si Timoteus sonai age bani ganup jolma na mangirikkon Jesus. Ai ma ase torang uhur pasal haganup. Seng tarbahren lang, buei tumang permasalahan na golap ibagas uhur ni jolma. Tarlobih bani jaman sonari on, buei tumang tuntutan kebutuhan ni dakdanak marhitei sikolahni na meningkat. Kebutuhan sehari-hari pe meningkat. Bagei cara ampa usaha na binahen, ganup hasilni lang mamuashon, golap uhur pasal haganup.

Sonaha do ase boi torang uhur pasal haganup, sonai ma partibalni na masa ai? Porsaya do hita anjaha tenger do uhurta, ampa yakin botul hita bahasa tugas pokok bani hita jolma ibagas na manlahoi ganup horjanta, ai ma ibagas na mangkorjahon hata ni Naibata? Lang ihatahon Naibata do bani jolma in ase ikuasai haganup sagala tinompani? Lang halani ai do ase marlahouan hita? Ihatahon do homa hasomanan-Ni hita ganup ari. Sonaha, tenger do uhurmu ijai?

Dakdanak ombahan, lang pala karingat dingin age pe ulog baganding montas ilobeini, halani iombah orangtuani do ia. Lang lobih sonai do hita pakon Tuhan in? Antong, marhasoman Tuhan in, torang do haganup uhur ni na mangirikkon-Si. Halani marhasoman Tuhan in, haganup na mangirikkon ibagas lahoanni bei, pasti sogam tumang uhur ni dunia on atap raja ni hagolapan in. Bagei do cara ibahen laho manirang jolma in humbani Tuhanni, na mambahen buei tumang paruntolon ni siirikkon Tuhan Jesus. Hansi pe sonai, seng na boi talu jolma in sadokah hot ia pakon Tuhan in. Seng na sanggup hagolapan in mantaluhon Jesus, ai do ase ihatahon Apostel Paulus, tahan bani hamarsikon.

Tahan bani hasunsahan artini ulang sirang humbani Jesus age pe sonaha koras ni hasunsahan mandorap goluh ni jolma in.

Tonggo: *Ningon rup pakon hanami ma tongtong Ham ale Jesus, ase torang uhurnami pasal haganup, tahan bani hasunsahan anjaha gabe ambilan haganup goluhnami. Amen.*

HALELUYA NO. 249:1+5

1. Seng tadingkononku Ham,
ale Jesus, Sipagoluh.
Sai irikkononku Ham,
sadokahni au manggoluh.
Ham do hagoluhankin,
seng tadingkononku in.

5. Seng be ra maimpol au,
bai ganup na laho salpu;
Sai hu babou mando lao,
tonduyhin marolob-olob;
Jesus, Ham do rupeihin,
sadokah-dokahni in.

GOLUH ARI-ARI

“Bere Ham ma bennami sadari on hagoluhan ari-ari.”

Mateus 6:11

Somal do hita loja ronsi maruntol laho mamingkirhon age na laho mansarihon goluh ari-ari on. Sipata maseda do parkawanon age kekeluargaan halani mansarihon ai. Mase ma pala sonai keadaanni? Tontu na hurang tangkas do banta aha na isobut goluh ari-ari

Goluh ari-ari sedo pitah sipanganon barang sinumon na jinalonta ganup ari, tapi termasuk do ijai sonaha caranta laho mansarihon goluh ari-ari on. Atap na gabe maseda do parkawanan, keluarga ibahen ham? Lang adong holong, hasintongan pakon na legan. Hape sonaha ma hita manjalo sipanganon, siinumon ai anggo lang torsa, lang mardamei?

Pasal sipanganon, siinumon sedo pitah soal boras, bah ai, tapi dihut do ijai keadaan ni juma, age harangan mambahen dong bah tubuh. Ase anggo isobut goluh ari-ari domma bahat hinamkamni, ai ma: Hunja sumberni, ise mangadongkon, ise na manramotkon ai pakon na usih hujai.

Ase ibagas na martonggo hita, ai ma na iajarhon Tuhan Jesus bani susian-Ni, porlu ibagas na sintong iarusi hita aha na pinindonta ai. Ulang ma namim idugot hita mangindo, hape seng na botoh aha do sasintongni pinindonta ai, janah hubani ise hita mangindo.

Domu hujai ma ase ipagolpa sirsir mambere haganup na porlu bani goluhta ganup ari. Ase patut Bani ma padas hita pangindoanta.

Tonggo: *Tuhan ajari Ham ma hanami mangindo hu Bamu ronsi mamakei ganup idop ni uhur-Mu. Ase sintong hanami martenger ni uhur hu Bamu bani ari-ari ni goluhnami on. Amen.*

HALELUYA NO. 457:1-2

1. Marhitei lima ruti, dua dengke,
i tamu Jesus do ganupan na roh in.
Dob itonggohon ipartopik use,
lanjar ibagihon bai sidea in.
Bosur mangan lima ribu halak,
anjaha dong ope sulei ni.
Dob ipatumpu ganup teba-teba,
dong ope sapuluh dua bantei in.
2. Usih sonin do hita tinobus-Ni,
na dob porsaya bani Tuhan Jesus in.
Jumpahan goluh na marlobih-lobih,
asal ma tongtong hita bujur ijin.
Roh ma hita! Irikkon Tuhanta,
la ma tong sibalosanta.
Seng ipaturut hita on gayuran,
tong do iparorot ase sai sonang.

AMBILANKON MA HATA IN!

“Ambilankon ma hata in, haringgashon ma bani panorang na dear atap na lang dear pe, pinsang, paingat, padahi marhitei lubang ni uhur banggal pangajarion.”

2 Timoteus 4:2

Sondahan on hotop do na tangar istilah mangihutkon situasi pakon kondisi. Domu hubani situasi pakon kondisi ma ipahona sagala pembahenan. Tapi anggo na pardiateihon ayatta sadari on hira lang marlaku botul istilah nongkan ai. Lang ihatahon Apostel Paulus bani si Timoteus: “Ambilankon ma hata in, pareksa situasi pakon kondisi setempat”, tapi torang do ihatahon ase iambilankon hata ni Naibata age panorang na dear atap na lang dear pe. Artini: Bani ganup panorang do gabe panorang parambilankononkon, janah marhasoman haringgason.

Hunjai taridah seng dong abat-abat na boi mangolat hata ni Naibata, atap situasi pakon kondisi na sonaha pe ai lang boi manundati ambilan na madear in. Hata ni Naibata boi mangatasi sagala situasi ni jaman.

Marubah-ubah pe keadaan ni dunia on, totap do hata ni Naibata. Domma martukar siparambilan, margantih homa na niambilan, tapi anggo hata ni Naibata totap do. Halani ai sanggah ibere Tuhanta ope panorang banta mangambilankon pakon manangar hata ni Naibata haringgashon hita ma ai.

Seng dong hape harugianta mangambilankon hata ni Naibata ai marguna do ai age banta sandiri. Sonai do homa age bani na manjalo hata ni Naibata, ai hagoluan sisadokah ni dokahni do tujuanni janah marisi podah, sipaingat pakon pinsang-pinsang na madear do homa ai.

Siparambilan ulang marnaloja janah porlu homa marhasoman lubang ni uhur. Porlu dingatonta bani na padashon ambilan na madear in, paboa suruhan ni Naibata do hita. Hata ni Naibata do na sihol patugahonta. Ulang halani na hurang lubang uhurta gabe itulak na manangar hata in. Partonahan na hinaporsayaan ni Tuhanta ma hita tongtong.

Bani hita na manangar ambilan pe, porlu dingatonta paboa sedo hata ni siparambilan ai hansa na tinangarta sanggah dong na marambilan, tapi Hata ni Naibata do. Na manulak hata ni Naibata na sintong iambilankon siparambilan sahira na manulak Tuhanta do hita ijai. Halani ai ambilankon hita ma hata in anjaha dihut ma hita homa gabe sijalo hata in.

Tonggo: *Ham Tuhan Naibata, pargogohi Ham ma hanami dihut gabe siambilankon hata-Mu, janah hanami pe sirsir do homa tongtong manjalo hata-Mu na gabe haluahonnam. Tarimakasih ma hatahononnam bamu Tuhan halani ipaturut Ham ope hata-Mu marianan i tengah-tongahnam. Amen.*

HALELUYA NO. 143:2+4

2. Andohar apuy-Mu ma gara,
marlintun bani bangsa haganup!
Jahowa, Ham paingkat halak
na bujur mangkatahon Hata-Mu.
Kawahkon Ham bolag sabion in,
Jabolon-Mu seng piga ope in.

4. Antong buei baen Ham suruhan,
sai na tongtong igoki Tonduy-Mu,
Janah na ringgas marambilan
manogu halak hu gomgoman-Mu.
Taluhon Ham sibolis in tongtong
ramoti Hata-Mu i tanoh on.

HADAULATON

“Pansarian banggal do tongon hadaulaton in, anggo marhasoman uhur na sonang.”

1 Timoteus 6:6

Dong halak na mangidah hadaulaton ni hun segi ekonomi hansa. Halak sisonai ai igolongkon si Paulus do bani halak na magouan hasintongan. Boi do hiraonta pansarian banggal hadaulaton in asal ma dong banta syarat songon na hinatahon ni ayat on, ai ma marhasoman uhur na sonang.

Aha do artini “marhasoman uhur na sonang?” Dapot do balos nion bani ayat ayat na mangihut bani ambilanta on, isini ai ma: Mangkasonangkon na adong banta. Sedo jajet na hurang. Bani halak na boi mambahen batas sisonai ai bani goluhni do hadaulaton in gabe pansarian banggal.

Halani ai porlu do pareksaonta lobei dirinta, atap sonaha ma tongon pangahapta bani na dong banta. Sedo na mangkatahon ase na miskin ma na boi sonon, lang. Bani ayat 8 torang do isobut dong do banta sipanganon ampa parhiouon, sedo na marhahurangan, seng homa loheian. Na porlu bani goluh ari-ari on sungkup do, tongon lang marlobih-lobih, seng homa loheian. Anggo na botoh ma mangkatahon tarimakasih pasal ai, anjaha malas uhur homa manjalo pakon mamakei ai, ai ma na tongon mangkasonangkon ai.

Na mambotoh sungkup do ibere Naibata bani haporluan siganup ari on, bani do hadaulaton in gabe pansarian banggal, halani seng be madabuh ia hubagas parlajouan ampa siding ni isibolis in, tapi maluah do ia humbani hamagouan pakon hasedaon anjaha seng be kahou ia humbani haporsayaon in. Lobih humbani pansarian banggal do use hiraon ai, anggo maluah ma diri humbani hamagouan, siding ni sibolis, tarlobih humbani hakahouan ni haporsayaon. Hunjai boi ma homa torang iarusi hita artini hadaulaton pakon ise do na ginoran na daulat.

Porlu homa ingatonta paboa seng na ilarang hata ni Naibata halak na daulat gabe bayak. Boi do bayak, tapi seng habayakonta ai be manrajai uhurta, tapi hadaulaton ai do gariada manrajai artanta pakon goluhta. Seng hape gabe harugian pala banta na maragama pakon na marhadaulat, tapi sebalikni do, ai ma gabe pansarian banggal na marguna bani goluhta sonari pakon simagira, halani seng kahou be hita ibagas haporsayaonta.

Tonggo: *Ham Jesus Kristus, urupi Ham ma hanami ase tongtong goluhnam*
marhadaulat ibagas Ham. Ibotoh hanami pansarian banggal do tongon
hadaulat in bannami sandiri. Amen.

HALELUYA NO. 251:2-3

2. Age ilioti sibolis pe au,
sol agouhononni ganup,
Dob matei Tuhanku manggoluh ma au,
utangkin dob sahei haganup.
Sonang do, sonang do,
ipasonang tongtong uhurhon.

3. Iporsan Tuhanku ganup dousangkin
bai silang-Ni in do ibaen;
Ge sada na so jujuron-Ni be in,
Na martuah tonduyhu ibaen.
Sonang do, sonang do,
ipasonang tongtong uhurhon.

IDOP NI UHUR NI JESUS KRISTUS

"Ai ibotoh nasiam do idop ni uhur ni Tuhan Yesus Kristus, na bayak hinan, gabe miskin halani nasiam, ase bayak nasiam halani sombuh-Ni ai."

2 Korint 8:9

Haganup do halak Kristen mambotoh pasal idop ni uhur ni Tuhanta Yesus Kristus ai ma na susur la hun Nagori Atas manadingkon "hamuliaon-Ni" laho manghopkop jolma on. Mambotoh, irik do ai pakon pangarusion. Atap hataonkon ma bahasa lape gok pambotoh anggo lape torang iarusi hita. Halani boi do sada halak mangkatahon domma tongon ibotoh tapi anggo mangarusi hurang ope. Ase hata na i atas on irik do on bani ayat 8, nini: "Sedo songon parentah hatangkon tapi laho manguji sintong ni uhur nasiam do marimbang habujuron ni halak na legan." Jadi lang pitah mambotoh pasal idop ni uhur ai tumang hansa tapi dihut do pangarusion, janah ibagas pangarusion ai ma taridah bani pangabakta sandiri bahasa sintong do hita na dob manjalo idop ni uhur ai. Taridah ma ai bani hasomanta na legan.

Hataridahon ni idop ni uhur ni Tuhan Yesus ai, ningon arusanta do ai bani na ra la mamberehon diri-Ni bahen haluahon ni jolma. Itaron do na marsik na sahira ampei bani abaranta. Ijai ma idop ni uhur ni Tuhan Yesus na so tardadap bagasni, janah pasal ai ma homa na porlu taridah bani goluhta. Domu hubani haluahonta tumang do ase manaron na marsik Tuhanta. Anggo ipingkiri hita ai aha ma untungni bani Tuhan Yesus manaron na marsik? Paruntungan banta do hansa ijai. Porini dong sada halak na bujur uhurni, sanggah marutang hita, mintor igalar utangta ai na so ibagas botohta, ai paruntungan do ai banta, janah patut marmalas ni uhur. Janah malas ni uhur ai patut sahali do patidakonta marhitei panlangkahta sonai age pangabak. Hatahononta ma na so ingkat hubotoh mintor igalar sada halak utangku halani ai malas do uhurhu. Dob salosei ham mangkatahon ai roh ma use hasomanmu mangkatahon usih songon hatamu ai: "Au pe dahkam dong do homa manggalar utangku lang pala huhatahon." Anggo sonai ma bahat mangkatahon, tontu roh ma sada sungkun-sungkun, ise do nani na manggalar ai? Balosta tontu, dong ma da sada halak hansi pe tongon lang tarbaen sada parbandingan antara parpambaenan jolma pakon parpambaenan ni Tuhanta, tapi lang lobih lang hurang la do na manggalar utang ni dousanta. Ia do pasaloseihon ganup utangta lang pala hita mangindohon pitah idop ni uhur-Ni do hansa janah holong atei-Ni mangidah hita. Ase patut ma hita marmalas ni uhur halani paruntungan banta. Talup m hita mangkatahon humbani bulat ni uhur hata tarimakasih.

Tonggo: *Humbani gok ni uhur do hanami mansombahkon malas ni uhur bamu Tuhan, sonai age tarimakasih nami halani idop pakon holong ni uhur-Mu. Amen.*

HALELUYA NO. 132:1+3

- | | |
|--|---|
| 1. Ai ambit lang do Ham,
parholong atei Ham
huja ma au? Halani holong-Mu
ampakon layak-Mu, hu surge au. | 3. Andohar ma holong atei hu
sai tongtong bujur Bamu.
Age huja pe au
sai hasomani au, sonang tumang. |
|--|---|

ABBA, BAPA!

"Tapi halani anak nasiam, isuruh Naibata do hubagas uhurta Tonduy ni Anak-Ni in, na mandilohon: Abba, Bapa!"

Galatia 4:6

Lang sungkup bapa atap inang pagodang-godangkon niombahni tumang. Maningon dihut do mammamahkon hauhuron pakon pangarusion marhitei na mammamahkon pangabak, adat, panlangkah na madear i tengah-tengah ni hajolmaon. Irik hujai do ase adong ahap na manggoluh ibagas hadirion ni dakdanak na songon panggora ni uhur. Mamodahkon pangarusion na tongon- tongon humbani bapa pakon inangni sandiri. Ase anggo lang adong na imamahkan bapa atap inang bani dakdanakni, goranan do sada halak na marbapa atap marinang, tapi anggo manjalo hata podah na manggoluh lang onggga. Jadi boi ma hatahonon, hurang tanggung jawab ni orangtua bani niombahni. Gariada podas do hita mangkatahon, si anu ai dakdanakta, hape anggo na sasintongni lang dong hubungan na erat tumang. Pasal on porlu jaga hita bani ganup panorang. Ulang das lepak hita mandalankon pangarusion bani hadirion ni dakdanakta. Ai anggo imamahkan hita rusia ni hauhuron bani ganup panorang, manggoluh do ai bani hadirion ni na manjalo ai.

Lobih hunjai ope hita ilobei-lobei ni Naibata. Ibere do banta sada halak ai ma na gabe anak hita ganupan ilobei-Ni. Ihasomani janah iramotkon do hita tongtong. Ase manggoluh panramotion-Ni ai, ibere do bani dirinta Tonduy Napansing. Ia do na mambere gogoh hubanta laho mandilo goran ni Naibata. Ase anggo mandilo goran ni Naibata hita, horja ni Tonduy Napansing do ai. Sahali pe lang margogoh hita mandilo goran ni Naibata anggo humbani hadirionta, tapi pitah horja ni Tonduy do ai. Ase marsurak-surak pe hita on mamuji, pasangapkon Tuhanta, anggo lang ihasomani Tonduy, aha pe lang artini ai. Tapi porini pe sip hita, anggo ibagas uhurta Tonduy Napansing marhorja, gabe mararti ma ai.

Jadi nington do ibagas ganup panorang hita mangahapkon anak do hita ilobei ni Tuhanta, marhiteihon ni ai tontu hu Bani do hita mardilo. Hu Bani do hita mansuhutkon sonai age marondos, halani ibotoh na porlu banta. Ase sirsir ma hita tong mardilo-Si, halani domma ibere banta pangarusion pakon ahap na manggoluh bahasa Ia do tongon na dob marhorja ibagas dirinta, hita on pitah mandilo tumang do.

Tonggo: *Ale Tuhan, parhioui Ham ma hanami marhitei Tonduy-Mu in, ase margogoh janah sintong hanami mandilo goran-Mu, Ham Bapa paridop ni uhur na tarsulur janah parholong ni atei banggal. Amen.*

HALELUYA NO. 132:2+4

2. Tarima kasih ma
Bamu, o Naibata
parlayak Ham!
Sibahen dalam in
marhitei Jesus in hu surga in.

4. Isuruh Anak-Mu
hubangku Tonduy-Mu
na hum Bamu,
manogu tonduyhin
hu hasonangan in, na puji Ham.

HASADAON NI JESUS PAKON NAIBATA

“Na mangidah Ahu, mangidah na marsuruh Ahu do.”

Johannes 12:45

Iluarhon Tuhan Jesus hata on ai ma na gabe sada balos domu hubani sungkun-sungkun ni halak Jahudi, na sihol mangidah torang bani panonggor ni sidea sonaha tongon rupa ni Naibata, ase porsaya sidea. Hansi pe sanggah marhorja Tuhan Jesus i Tanoh Palestina, tongtong do mangambilankon pasal hadirion-Ni, hasadaon-Ni pakon Naibata. Tapi lang ope sidea porsaya anggo lape iidah rupa ni Naibata. Lang sungkup pitah Jesus tapi maningon dihut do Naibata sihol tandaon ni sidea. Padahal anggo domma marsahap Tuhan Jesus, sahap ni Naibata sendiri do ai, halani dos hadirion-Ni pakon Naibata janah Hata ni Naibata do Hata-Ni.

Sintong do anggo na pingkiri, dong sada suruhan na mamboan tonah atap na gabe utusan, sihol do homa botohon atap ise na marsuruh sipamboan tonah ai. Ija hutani, aha horjani pakon na legan sihol do tongon ai bahasa dos do ai pakon na marsuruhsi, janah hatani ai pe dos songon hata ni na marsuruhsi, aha ma gunani porlu banta atap ise na marsuruh ai? Na porlu banta on do; ljalo hita atap lang hata ni tonah ai, ihaporsayai hita do atap lang anggo domma ihatahon na mamboan tonah ai bahasa dos ia pakon na marsuruhsi?

Ase ibagas na mangarusi artini hata ni Naibata marhitei sungkun-sungkun sonaha do ai tongon? Tapi marhitei haporsayaon do. Ai anggo lalab do hita sungkun-sungkun lang marhaporsayaon, sadokah ai ma lalab lang marhatontuan hita. Suba hita ge marsungkun bani dirinta sada-sada masalah. Ra dapot do balos tapi sungkun hita use, mase sonai? Dob dapot balos na baru, sungkun hita use, mase sonai? Jadi lalab ma lang dong ujung ni parsahapan, halani domma namin dapot balos, tapi lalab do hita sungkun-sungkun, lang onga porsaya.

Anggo sonai ma hita marsungkun pasal hasadaon ni Jesus pakon Naibata, simbei ma haporsayaonta, halani tongtong pe Jesus mambere haluahon, sisoya-soya do ai anggo lang dong haporsayaon banta. Anggo sonai sonaha do? Mambalosi sonai ai age mangarusi hata ni Jesus na banta on, ningon dong do haporsayaon. Manjalo ibagas bulus pakon putih ni uhur bahasa na roh do Naibata manohu jolma ibagas hadirion ni Jesus. Sonaha pardongni ai? Torih ham Jesus, haporsayai ham Ia, halani ganup hata-Ni na humbani Naibata do ai. Anggo domma ihaporsayai hita janah lang sangsi hita dapot hita ma arti hasadaon ai.

Tonggo: *Ham Naibata, pabotohkon Ham ma hubannami tongtong ibagas haporsayaon na manggoluh, paboa na sintong do Ham sada pakon Anak-Mu Tuhan Jesus Kristus, na dob isuruh Ham roh hutongah-tongah nami. Amen.*

HALELUYA NO. 91:1

1. Naibata do na margoran
Bapa, Anak, Tonduy in.
Siilohkon paringoran
na manirang tonduyhin

humbai hagoluhan in
na tagang i surga in.
Na dob sasap do dausangku.
ibaen holong-Mu hubangku.

MARHORJA MA HITAI!

“Anjaha haporluhon nasiam ma ase parsip nasiam marsiurus urusanni bei anjaha marhorja ma tangan nasiam, songon na dob iparentahkon hanami bani nasiam.”

1 Tesselonika 4:11

Bani na manjalo Hata ni Naibata hita porlu do dong pangarusion. Jadi lang sungkup pitah manjalo tumang hansa. Porini asal ijalo hita hansa hata na iatas in, ra ma tubuh ibagas uhurta ase sip ma lah hita bani haganup, dugot hita horjanta lang pala porlu hasoman na legan.

Tongon do sonai ihatahon si Paulus na ijia bani halak Tesselonika ase parsip sidea janah marhorja. Tapi porlu do botohonta bahasa na dong do halani ase ihatahon si Paulus sonai. Gati sidea bahattu sahap. Gab mangurusi horja ni halak gabe lupa ia bani horjani. Seng pitah ai, dihut do homa manrisai hasoman, tapi anggo manranai dirini lang onnga. Hahurangan ni halak do use isahapi gabe lupa ia mamingkirhon na porlu bani sandiri.

Ambah ni ai gati do porlunan mansahapkon haporsayaon ni hasoman na legan ase marimbang haporsayaonni sandiri. Jarang ma ai adong sungkun-sungkun bani diri ni sidea sandiri, sonaha ma tongon haporsayaon ronsi horjangku sadokah ni ari on.

Ase hita, ulang be porlunan banta mamareksa horja ni halak ase horjanta sandiri. On ma sada dalan laho mananda dirinta. Tapi sonai pe porlu do hita marsaor. Ulang halani ihatahon ijon parsip janah marsiurus urusanni bei, gabe ise pe lang na porlu banta. Janah ihatahon hita homa, sonai do nini hata ni Tuhan! Marsiurus urusanni bei ma lah, pingkirhon ham na bamu hupingkirhon na bangku! Lang sonai.

Songon na dob tangkas iarusi hita, age pe iojur hita ase parsip janah marsiurus urusanni bei, sedo na lang porlu hasomanta na legan! Porlu do parsoran ai tongtong. Hansa bani parsoran ai ulang hita lepak mandalankon, halani gati jumpah bani partumpuan, parjumpahan piga piga halak, sedo anggo soal hamajuon isahapi, tapi manranai halak do use. Manorih sambor ni halak, sedo anggo samborni sandiri.

Tapi tongtong ma hita marhorja, ai ma na gabe hitei pasu-pasu ni Tuhan janah marsaor ma hita tongtong, ulang saor ibagas manguhur-uhuri halak ampa manranai.

Tonggo: *Tuhan, patotap Ham ma uhurnami ase ulang lupa hanami bani horjanami halani manguhuri hasomannami, janah pabotohkon Ham bannami na madear; domu hubani Titah-Mu. Amen.*

HALELUYA NO. 411:1-2

- | | |
|---|---|
| 1. Diatei tupa ma Bamu Ham Naibata,
mambaen tupa humpulan nami on.
Igomgom Ham do horja nami on torsa,
gok malas uhur do hanai ijon.
Ibere Ham do damei na tarsulur,
sanggah manranggi horja haganup.
Nuan hanami rap marmalas uhur,
mardingat haganup pambaenan-Mu. | 2. Ipardimata Ham do tong hanai Tuhan
ai sorap do Tonduy-Mu in tongtong.
Ase torsa mardalan horja ganupan,
Kuasa-Mu do in mambaen sintong.
Porini dong rundur ni paruhuran,
sirsir do Ham manohu hanai on.
Ai Hata-Mu do tong na pagolpahan,
mambaen tapang nuan ganup ijon. |
|---|---|

MANGKATAHON TARIMA KASIH

“Halani ai mangkatahon tarimakasih do hanami tongtong bani Naibata, ai ijalo nasiam do hata ni Naibata, na binogei nasiam humbannami, ijalo nasiam do in, sedo songon hata ni jolma, tapi songon hata ni Naibata do, ai in do tongon, gabe marpangkorhon ibagas uhur nasiam na porsaya.”

1 Tessalonika 2:13

Apostel Paulus pataridahkon horjani marhitei na gok tanggung jawab hu tonggah-tongah ni kuria pakon ilobei ni Naibata. Horja ni Naibata na dob ondos bani ai ma mangambilankon ambilan na madear, ihorjahon marhitei gok malas ni uhur.

Malas ni uhur ni Apostel in ai ma halani sirsir kuria na i Tessalonika manjalo pakon mangkagoluhkon ambilan na madear sedo songon hata ni jolma, tapi Hata ni Naibata do. Botul-botul do Hata ni Naibata marhorja ibagas parambilanon ai, ronsi na paahapkon ai bani kuria in. Panjaloan ni kuria in bani ambilan na madear na pinadas ni siparambilan, gati do lang marpangkorhon. Atap hatahonon ma lang sahira hata ni Naibata ai. Tapi gati inilai ambilan ai humbani sudut hajolmaon hansa, na mambahen tongtong bani Naibata, on ma sada hal na porlu banta halak Kristen, songon na dob binahen ni Apostel in sandiri. Keberhasilan ni Paulus bani horjani ai ma halani tongtong iahapkon na ipargogohi Naibata do ia mangkorjahon horjani. Janah pitah hubani Naibata do ia mangkatahon tarimakasih sedo hubani jolma atap hubani dirini. Gati do na idah itongah-tongahta, gatinan martarimakasih bani samah-samah hita, janah lupa martarimakasih bani Naibata. Gariada tene, kesuksesanta bani horjanta gati mamboan hagijangan ni pribadi atap kesombongan.

Goluh na martarimakasih bani Naibata ai ma goluh na tongtong mangahapkon Naibata do simadasi. Sihol ma bani ganup horjanta pakon aktifitas ni голуhta bei pataridahkon habanggalon ni Naibata, janah na tongtong martarimakasih. Bani keberhasilan atap keagalanta bani horjanta siganup ari ningon do tongtong hita martarimakasih, hape sanggah sunsah lang. Ase tongtong ma hita martarimakasih hu Bani, bani ganup голуhta.

Tonggo: *Tarimakasih ma bamu Ham Naibata, na tongtong mansarihon goluhnami. Amen.*

HALELUYA NO. 248:5-6

5. Tarima kasih ma uhurhu,
Bamu na manondangi au;
Hupuji Ham, ale Tuhanku,
itodoh Ham, hapeni au;
Megah ma tonduyhin nuan,
dob hutandai Ham.

6. Parorot tongtong langkahku
bai ganup dalan na botul;
Patoguh Ham tongtong uhurhu,
lao mandalankon hata-Mu;
O sondang na hun surga in,
sondangi uhurhin.

ANAK NI NA LIHAR

“Ai haganup do nasiam anak ni na lihar anjaha anak arian, seng borngin atap na golap simada hita.”

1 Tesselonika 5:5

Bani tahun parpudi on, ididah hita do hamajuan na pesat tarlobih ma bani bidang kedokteran. Songon na boi iudut goluh, marhitei na manukar jantung ni sada-sada halak na dob maseda jantungni, gabe boi manggoluh piga-piga dokah nari. Tapi age pe sonin hamajuan ni teknologi bani panorang on, anggo secara total angkulanta boi ope irombak.

Goluh na baru mangihutkon Bibel sedo penggantian sebagian hansa, tapi penggantian secara total. Biak sisapari atap biak na golap ipadaoh, janah isalukhon goluh na baru atap biak na baru. Biak na baru ai ma marhitei na dob manjalo Kristus goluhni. Ase Kristus do na marparbaharui. Sedo humbanta roh ni ai. Marhitei Pandidion domma gabe anak na lihar hita, domma iuseihon hubanta Tonduy Napansing paliharhon hadirionta, domma gabe anak ni Naibata hita. Anak na lihar tontu mardalan bani na lihar seng be mardalan bani na golap. Kristus sandiri do mambere haanak-anakon ai banta. Ia sandiri Anak ni Naibata na mambere haliharon. Ia do panondang ni dunia on, janah ise na mangihutkon-Si seng anjai mardalan bani na golap. (Johannes 8:12) Jelas hape hubanta, halak na mangihutkon-Si, ai do goranon anak ni Naibata. Sedo asal Kristen, tapi botul-botul pataridahkon ibagas goluhni siihutkon Kristus ai. Halak na dob gabe anak na lihar ai ma halak na tongtong pataridahkon horja haliharon, pakon na tongtong marpangarapan bani Naibata, sonai pakon pangarapan bani goluh na paduahalihon ai. Halak na lihar berarti puho bani horja na madear, mardalan bani dalan na pinatuduhkon ni Tuhan. Ise do boi mardalan bani dalan in, ai ma na porsaya janah na mambahen Jesus gabe panondangni.

Tuhanta do na palihar dalanta bani hasintongan. Janah seng ra kahou halak na mambaen Jesus arihanni. Sihol ma pangabakta, parlahouta pakon haganup panggulmiton ni goluhta pataridahkon horja haliharon ai.

Tonggo: *Ham Tuhan Naibata, tarimakasih ma hatahononnamu Bamu, halani domma itodoh Ham hanami gabe anak-Mu, ase sihol ma hanami manggoluh domu hubani harosuh-Mu. Amen.*

HALELUYA NO. 17:2-3

2. Golap uhurnami on,
nin homa pambotohnamu.
Anggo seng Tonduy-Mu in,
paliharhon uhurnami.
Ningon Ham do patureihon
dalan sidogeionnamu.

3. Sondang humbai Naibata,
haliharon roh hun datas.
Baen torsa, sondangi ma
uhurnami, ase megah.
Lao manjalo hagoluhan,
Pinasirsir-Mu o Tuhan

UDAN PASU-PASU

“Songon udan na madabuh bani poyon-poyon ma ia, songon udan neinei na mangarbahi tanoh.”

Psalmen 72:6

Udan ai ma sada gambaran pasu-pasu pakon hadameion. Songon udan na pamomburhon suan-suanan, sonai ma sikap ni sagala sipambobai mambangun goluh ni bangsani. Suan-suanan na domma dokah lang iarbahi udan, perkembanganni lambat bahkan melus janah mungkin gabe matei, halani sumber ni goluhni ai ma bah atap udan na madabuh hu tanoh. Janah tanoh ai sandiri mambere sipanganon bani suan-suanan sonai pakon poyon-poyon boi mombur anggo cukup hona udan atap zat cair. Usih do poyon-poyon in songon goluh ni jolma atap usih songon angkulanta na mamorluhon zat air lebih satongah ni kebutuhan ni angkulanta.

Sonai ma martumbor hapintoron itongah-tongah ni goluhta, tarlobih ma ai ibagas siparkuasa dampak bawahanni. Hapintoron pakon hadameion ai memang mahol do roh, anggo sadokah lang ope Naibata mamberehon. Naibata do sabotulni sumber bah tubuh pakon hapintoron ai. Boi sada halak mangkorjahon hapintoron pakon hadameion ai ma anggo domma ipargogohi Tuhan Naibata ia. Naibata do na marhorja ibagas dirinta gabe boi mamparbuahkon buah na madear, janah mangkorhon bani hasoman. Goluhta cukup berguna bani hasoman anggo mabaor humbanta bah tubuh hagoluhan na humbani Naibata. Gati do goluhta, parlahouta lang boi mambaen perkembangan bani hasoman, songon sada suan-suanan na lang dapotan bah. Gariada tene, gati do goluh ni halak Kristen songon udan sira-sira na parsedahon suan-suanan. Hansi pe iakui hita bahasa udan ai ma na porlu bani poyon-poyon, tapi gati do homa udan mamboan bencana atap banjir use. Tontu marhitei tonggo ni Par-Psalmen on lang anggo udan na marhaba-haba atap sira-sira maksudni. Tapi udan na boi mambaen dear poyon-poyon.

Sikap ni halak Kristen ai ma sikap na boi mangarbahi uhur ni halak na madoyuk pakon bani na horahan. Pambahenanta sihol ma tongtong marhasoman pakon mamboan pasu-pasu i tongah-tongah ni masyarakat. Ase boi marpasu-pasu goluhta bani hasoman ai ma anggo domma tongon-tongon ijalo hita pasu-pasu na humbani Naibata.

Tonggo: *Pargogohi Ham ma hanami Tuhan mangkorjahon hapintoron i tongah-tongahnami, janah boi goluhnam i marpasu-pasu bani hasoman. Amen.*

HALELUYA NO. 122:4

4. Barang ise na horahan
bani hapintoron in,
na martuah do sidea,
ai tongon do jumpah in.
Sai na sonang uhur ni
na marhapintoron in.

HAJONGJONGANTA

“Nasiam sanina, hu paingat ma nasiam pasal ambilan na madear, na dob huambilankon bani nasiam, na dob jinalo nasiam, na gabe hajongjongan nasiam.”

1 Korint 15:1

Hajongjongan ai ma mangatur partibal pakon keadaan ni sada-sada halak. Anggo hajongjongan ni sada halak tutur boru i tongah-tongah ni rumah ni tondongni, tontu hatibalanni ijai, ai ma siparugas atap siparhobas. Hajongjonganni ai do manontuhon aha horjani. Gati do lang ibotoh sada halak sonaha hajongjonganni mambahen lang homa ibotoh aha horjani.

Jemaat na i Korintus ipaingat Paulus ase ulang lupa sidea bani bani hajongjonganni pasal ambilan na madear. Sipaingat ni si Paulus on ma marlaku homa do age bani goluh ni halak Kristen sonari, ija domma buei na manlembang hajongjonganni na sasintongni ai. Hansi pe domma iakuhon bani na masuk gabe halak Kristen na maningon tongtong ia mangkaporsayai Naibata Bapa, Anak pakon Tonduy Napansing, tapi hataridahonni lang sonai. Bani ganup acara kebaktian Minggu ihatahon hita do: “Ahu porsaya bani Naibata Bapa, Tuhan Jesus, Tonduy Napansing,” hape bani hataridahanni ibagas ari-ari ni голуhta legan do use.

Hata ni Naibata ai ma ambilan na madear na dob jinalonta, sihol ma botul-botul gabe hajongjonganta. Hata-Ni ai do onjolan bani голуhta. Anggo malembang hita hunjai, tontu domma magou hita. Halak na lari humbani onjolan ni goluhni na sasintongni usih ma ai songon sada kapal torbang na mandarat lang tiba landasan, dobni maseda ma kapal torbang ai. Buei halak na dob magou marhitei na lang sintong-sintong pangkaporsayaonni bani hata na dob jinaloni. Hatani Naibata ai do sabotulni голуhta pakon artanta. Hata-Ni ai do na pademeihon jolma. Ase halak na manjalo ambilan na madear, hape lang ihagoluhkon sisoya-soya do ai. Tapi halak na manjalo atap manangar Hata ni Naibata pakon marimbagashonsi, ai do na martuah.

Halak na manjolom poltik hata ni Naibata ai do na maluah. Maningon songon na mandokdok ria-ria, poltik panjolomta bani hata ni Naibata. Lang boi ganggang dargos. Hita halak Kristen sihol ma tongtong barani mangkajongjongkon haporsayaonta, ai ma Naibata Bapa, Anak pakon Tonduy Napansing.

Tonggo: *Ham Tuhan Naibata pargogohi Ham ma hanami ase ulang lepak hanami humbani hajongjongannami, ai ma Hata-Mu in, ase ulang magou hanami. Amen.*

HALELUYA NO. 18:1-2

- | | |
|--|---|
| 1. Hata-Mu ale Tuhanku,
arta siharganan ai.
Sai palongkot bai uhurhu,
ulang lang hujolom ai.
Anggo seng be sijoloman
Hata na madear in,
aha ma na baen onjolan
ni haporsayaonkin. | 2. Ale Jesus, sai kawahkon,
sai parorot Ham au on.
'Se totap haporsayaon
mangiankon uhurhon;
Sai paringgas Ham uhurhu,
Manangihon Hata ai;
Sai horahan bai podah-Mu,
songon si Maria ai. |
|--|---|

ULANG MABIAR, MAROLOB-OLOB MA!

“Ulang mabiar ho ale tanoh, marolob-olob anjaha marmalas ni uhur ma ho, ai banggal do pambahenan ni Jahowa.”

Joel 2:21

Songon idop ni uhur ni Bapa mangidah niombahni sonai ma idop ni uhur ni Naibata mangidah bangsa-Ni. Marpangulaki do uhur ni Jahowa dampak bangsa-Ni. Bangsa ni Naibata na dob mananda hahuranganni, anjaha isololi dirini janah na ra mulak hubani Naibata, sirsir do Naibata manjalosi. Idop ni uhur ni Naibata bani bangsa-Ni ai, ai ma na patuduhkon pambaenan-Ni na sonin bueini. Keadaan ni sidea sanggah ibagas parlajouan ai domma ipasuang Naibata marhitei na mambere sagala na porlu bani sidea. Ipadaoh serangan ni munsuh, ibere sipanganon, pinahan, hapentaran anjaha seng be roh haboron. Haganupan sibere-bere ipakei atap ijalo marhitei malas ni uhur.

Buei do halak na mabiar bani goluh on, mabiar anggo seng dong pansarian, anggo lang adong habotohon pakon na legan. Tapi marhitei hata on, iojur haganup hita ase ulang mabiar, tapi marmalas ni uhur pakon marolob-olob. Lang dong be habiaran banta baik mamingkiri goluh siganup ari sonai pakon mamingkiri goluh partonduyon. Halani domma sirsir Naibata mambere sagala na porlu banta tarmasuk homa mamberehon goluh sisadokah ni dokahni ai. Marolob-olob ibagas Naibata. Marolob-olob, martarimakasih dampak Naibata.

Siolobkononta, ai ma pambahenan ni Naibata banta. Anggo ipareksa hita haganup pambahenan ni Naibata banta maningon talup do tongon hita marolob-olob bani goluh on.

Bulan September ai ma bulan na bersejarah bani GKPS, ijai ipatuduhkon Naibata holong-Ni bani halak Simalungun gabe das ambilan na madear hu tongah-tongahni. Ambilan na madear ai, mamboan gok pasu-pasu pakon perubahan bani halak Simalungun khususni pakon bani dunia on. Mardingat pardas ni ambilan na madear hu Simalungun, ibahen hita puji-pujian pakon parolob-olobon bani Naibata. Porlu homa sungkun hita dirinta atap dihut do hita marolob-olob! Atap ninta do ibagas uhurta: “Nasiam ma marolob-olob, tapi anggo au lang pala.” Naibata mangindohon hubanta, ase ganup hita marolob-olob mamuji Naibata, halani ganup do hita ipaluah. Ase ulang pala mabiar be hita bani goluhta, ai sirsir do Naibata mangkasomani hita pakon mamberehon na porlu banta.

Tonggo: *Pujionnami ma Ham Naibata, halani buei ni idop ni uhur-Mu bannami, jalo Ham ma hanami marhitei pambahenan-Mu pakon idop ni uhur-Mu. Amen.*

HALELUYA NO. 499:1-2

- | | |
|--|--|
| 1. Panorang olob-olob,
sai roh ma hita ganupan.
Riap ma mangolobkon,
Ambilan na ondos banta.
Domma liar nuan ganup
i kehen in, 'ge i huluan.
In ma kuasa ni Hata-Ni
Tuhan in, mandilo hita. | 2. Hata ni Naibatanta,
do mambaen mangasup hita.
Bani sagala horja,
na dear bani Tuhanta.
Domma liar nuan ganup
i kehen in, ge i huluan.
In ma kuasa ni Hata-Ni
Tuhan in, mandilo hita. |
|--|--|

BATAR-BATAR

“Age pe lambin melus badanku pakon uhurhu, batar-batar bani uhurhu ampa rupeihu, ai ma Naibata sadokah ni dokahni.”

Psalmen 73:26

Anggo roh sungkun-sungkun hubanta, mase nani parjahat in roh bayakni janah lambin martumbor, hape parpintor in gati idorap paruntolon atap sitaronon? Sonaha do balosmu? Bagei do balos boi ibahenjolma mambalosi sungkun-sungkun sisongon on. Parpsalmen ijon ai ma si Asaf mambere sada hasaksianni na boi mambere hatorangan, balos ni sungkun-sungkun on.

Humbani ganup na adong in, sada do hansa na totap, ai ma Naibata na sadokah ni dokahni. Marpunsa do ganup na adong i tanoh on, marbatas do age pingkiran, lambin matua daging matua do homa pingkiran. Songon poyon-poyon anggo roh milas ni ari melus ma ia, dobni madabuh hu tanoh. Sonai do homa agejolma on, roh dokahni lambin melus, marpunsa do hape janah marbatas. Halani ai do ase seng tarpangajamkon na adong i tanoh on bahen batar-batarta. Seng tarpangunsagahkon hape gogoh atap pe pingkiran janah seng dong age aha na i tanoh on na boi manjamin goluh on. Martumbor pe parjahat in i tanoh on tapi seng adong hasonangan bani sidea, bulinsah do pangahapan ni sidea halani pingkiran atap pe gogohni do ibahen gabe batar-batarni, janah torus do sidea ibagas hakahouan.

Anggo sonai sonaha patut hita manggoluh? Maningon marhasabaron do hape hita janah tongtong mambahen Naibata na gabe batar-batarta. Legan do sura-sura ni Naibata pakon sura-sura nijolma. Ai do ase porlu hita manggoluh mangihutkon sura-sura ni Naibata. Sura-sura ni Naibata boi iahapkon hita anggo ipataridahkon hita bani голуhta on pambalosion na gok bani Naibata.

Sintong, anggo Naibata do ibahen gabe batar-batar bani goluh on, seng anjai maimpol hita mangidah age aha pe na adong i dunia on, janah seng mangapian atap pe taruyun hita hubani hakahouon ni parjahat in. Halani anggo marosuh Naibata boi do pitah sangkababah hata tumang na adong in gabe masab, janah na seng dong in gabe adong.

Tonggo: *Ham Bapa, sintong ibotoh hanami na laho salpu do ganup na i tanoh on, tapi anggo Ham totap do ronsi sadokah ni dokahni. Urupi Ham ma hanami ase ulang maimpol hanami mangidah na adong i dunia on, tapi ase marpangunsandeian hu-Bamu hanami. Tarimakasih ma Bamu Tuhan. Amen.*

HALELUYA NO. 249:2+5

2. Ganup binere-Mu in,
tonduy pakon angkulangku.
Hosah ampa gogohkin
ronsi haganup artangku;
Huondoskon in Bamu
seng paosoronku in.

5. Seng be ra maimpol au,
bai ganup na laho salpu;
Sai hu babou mando lao,
tonduyhin marolob-olob;
Jesus, Ham do rupeihin,
sadokah-dokahni in.

HORJA NI HAPORSAYAON

“Haporsayaon in pe sonai do. Anggo seng dong horjani, na dob matei do ai ibagas dirini.”

Jakobus 2:17

Sahalak ihatahon parholong, ai ma marhitei na ra ia pataridahkon holong ni uhurni hubani hasomanni jolma. Sahalak ihatahon na jungkat, ai ma marhiteihon na tongtong atap pe gati ibahen na seng madear hubani hasomanni jolma. Seng sintong sahalak ihatahon parbujur atap pe na jungkat anggo seng taridah ai humbani pambahenanni atap pe pangabakni. Usih hujai do homa age haporsayaonta in, maningon adong do horjani na ipataridahkon hita marhitei pambahenanta. Anggo ihatahon hita, na porsaya do ahu, maningon sungkunonta ope, hubani ise do porsaya janah haporsayaon na sonaha do haporsayaonta ai? Porsaya do hita adong Naibata, porsaya do homa hita adong sibolis. Sibolis pe porsaya do adong Naibata anjaha hitir-hitir, tapi seng ipataridahkon sibolis ai pambalosion hubani Naibata. Halani ai, haporsayaon in hape ai ma ibagas pambalosian na gok hubani na nihaporsayaonta in.

Hubani ise do hita porsaya? Anggo hubani Naibata do hita porsaya pataridahkon hita ma pambalosion na gok bani Naibata seng pambalosion hubani setan-setan atap pe dunia on. Pambalosion ai ma horja ni haporsayaonta ai, ai ma mambalosi atap pe mandalankon na hinatahon ni Naibata hubanta. songon si Abraham na pataridahkon pambalosion na gok bani Naibata na laho manggalangkon anakni ai. Pambalosion do anggo sirsir hita pataridahkon hani ganup goluhta harosuhni Naibata. Pambalosion na gok do anggo ra hita manggalangkon ganup hawajibanta i tongah-tongah ni kuria age bani masyarakat. Doshon na matei do haporsayaonta in anggo seng ipataridahkon hita pambalosion na gok bani Naibata. Doshon na seng dong do ganupan na nihorjahonta in bani goluhta on anggo seng na jinuljul ni pambalosion bani Naibata.

Tonggo: *Tuhan! Ajari Ham ma hanami ase boi ipataridahkon hanami pambalosion na gok hu Bamu, ai do horja nihaporsayaon in. Juljuli Ham ma uhur sonai age haporsayaonnami ase sirsir hanami mambalosi parentah-Mu, ase sintong boi marhaporsayaon na manggoluh hanami. Amen.*

HALELUYA NO. 115:2+5

2. Sai songon hayu dear ho
ramos parbuahniin.
Bulungni pe tabun homa
usihi ma sonin.

5. Sai tiru Tuhan Jesus in
na roh mangkopkop ho.
Pambaen-Ni 'ge Hata-Ni in
hagoluhanmu do.

SIDALANKONONTA BEI

“Ai pe on do sipaingathu parlobei humbani haganup. Sihol ma dalankononkon pangindoan, partonggoan, pangapition ampa hatarimakasihon manghopkop haganup jolma.”

1 Timoteus 2:1

Sada tonah hubani haganup kuria na maningon padason ni si Timoteus, ai ma ase dihut tonggohonon ganup jolma, pamarentah, raja, bangsa sipajuh begu-begu sonai age pamarentah na gati mangayak-ayak halak Kristen na parlobei ai, seng dihut sitonggohonon.

Gati do hita martonggo, tapi ibagas na martonggo hape hita, seng sungkup pitah dirinta atap pe keluarganta tumang hansa sitonggohonon, tapi haganup jolma do. Jesus roh hu dunia on ai ma laho manobus haganup jolma, na bayak, na musil, na sangap, na masombuh. Naibata mangkarosuhkon ase haganupan podas ijlo Ambilan na Madear in. seng dong sada jolma pe i dunia on na idarat ni holong ni Jesus Kristus. Tapi jolma in sandiri do lalab seng manjalo holong ni Jesus. Ai do ase porlu homa tonggohonon sidea na seng manjalo ai janah padas hita homa hatarimakasihonta bani Naibata marhitei tonggonta

Pangapition pe porlu do ibahen hita ibagas goluhta on. Songon Jesus na mangapiti susian-Ni, sonai homa hita padashon tonggo pangapition bani Naibata, ai ma mangapiti hasoman jolma na gati marburu halak Kristen atap pe mangambati horja i kuria in, ase ulang ibaloshon Naibata dousani ai bani sidea. Sasintongni seng dong sada jolma pe i dunia on na gabe munsuh ni halak Kristen, tapi na seng iarusi sidea do horja ni halak Kristen ai. Ai do mambahen ase porlu sidea itonggohon, ase iarusi sidea horja ni Naibata i dunia on.

I atas ni ai haganupan, tarimakasih ma hatahononta bani Naibata halani holong pakon idop ni uhur-Ni banta.

Tonggo: *Tarima kasih ma bamu Bapa, halani ibere Ham Anak-Mu roh hu dunia on laho paluahkon ganup jolma. Halani ai pagolpa Ham ma tongtong hanami, ase ganupan jolma dihut itonggohon hanami, ase ganupan dihut parsimada Bamu. Urupi Ham ma hanami laho mandalankon in. Amen.*

HALELUYA NO. 145:3-4

3. Horjahon bujur
Hata-Ni ganup,
sai monang jojo
baenon-Ni ganup.
Ai la do Raja
na monang tongtong,
patitir pe bala
manginsurut tong.

4. Holong atei-Mu
Tuhan Naibata,
pasaud Hata-Mu
tumpaki homa,
haganupan horja
ni jabolon-Mu;
Martuah homa ma
baen Ham jolma on!

SONARI MA PANORANGNI

"Ai nini do: Bani panorang idop ni uhur do ho Hutangihon, anjaha bani panorang haluahon do ho Huurupi. Tonggor ma, sonari ma idop ni uhur, tonggor ma, sonari ma panorang haluahon."

2 Korint 6:2

Nini sada pepatah na mangkatahon: Waktu itu adalah uang. Aha do na imaksudni atap arti ni ai? Ai ma ase patugahkon arga ni panorang. Domu hujin ma ase pandai laho mamakei panorang, ulang lansei pasal panorang, halani panosalan i pudi ni ari lang dong guna ni. Marhiteihon porluni panorang bani jolma na idah do ai kegiatan hidup jolma na i kota sonai age na i huta, sibuk na laho mamakei panorang na satongkin ai. Ai ma na laho memenuhi ari-ari on.

Sadalan hubani ayat na banta sadari on ihatahon do: Sonari ma panorang idop ni uhur ai, janah sonari ma panorang haluahon ai. Bani mandalani panorang hita isungkun do hita homa: Sonaha do nani age hita ibagas goluhta na mamorluhon goluh ni partonduyonta? Sonaha do kesibukanta mamorluhon haluahon ni tonduyta marhitei parpasirsir ni Tuhanta, ai ma marhiteihon ni idop pakon holong ni atei hubanta na pala matei la halani dousanta? Ibagas na lansei do hita mamakei panorang binere ni Tuhanta hubanta, atap marlambin-lambin ope panorang on pakeionta laho mangayaki, manjalo idop ni uhur pakon haluahon na binoan ni Tuhanta hubanta?

Sonari ma panorangni idop ni uhur ai, janah sonari ma panorang ni haluahon ai. Domma roh Kristus Anak ni Naibata laho paluahkon hita jolma pardousa on, domma pala matei la halani dousanta, janah domma puho la, janah domma naik la hu lambung ni Naibata Bapa in laho pasirsirhon ianan banta. Halani ai roh ma hita marhiteihon panorang na dong banta sonari, laho manjalohon idop ni uhur pakon haluahon ai. Ulang hita lansei bani panorang na satongkin hubanta na binerehon ni Tuhanta sadokah ni goluhta on, atap na ibagas hadakdanakon pe, ibani panorang haposoon, sonai homa age bani panorang hatuaon pe, pardimatahon hita ma panorang on. Podas ma, pakei ma panorang in laho marayakkon idop ni uhur ai, pakon haluahon na pinasirsir ni Tuhanta, ai sonari ma panorang ni idop ni uhur ai, janah sonari ma panorang ni haluahon ai.

Tonggo: *Ham Tuhan Jesus Kristus Tuhannami, domma tongon roh Ham laho mamboan idop ni uhur pakon haluahonnami, halani ai Tuhan, ajari janah papangkei Ham ma hanami na laho mamakei panorang na binere-Mu bannami laho manjalohon haluahon ni tonduy age dagingnami. Amen.*

HALELUYA NO. 130:1+6

1. Ai domma jumpah au ondolan
ni tonduyhin na manogu in;
Daroh ni Jesus do manahan
sadokah ni dokahni in.
Maseda pe dunia on,
tongtong togap ondolan on.

6. Ondolan on ma iananku,
sadokah au i tanoh on.
Sai in ma hagoluhononku
paima rotap hosahkon.
Tongtong do sipujionkin
Tuhanku, Sipagoluh in.

ITANGIHON DO PANGINDOANTA

"Anjaha, anggo ibotoh hita, itangihon do hita atap aha pe na pinindonta, jadi ibotoh hita ma, na tongon ma jumpah hita na pinindonta ai hum Bani."

1 Johannes 5:15

Nini hata na mangkatohon: Anggo mangindo ase huntoruh tangan, artini ai: Anggo laho marsuhutan atap laho mangindo hita hubani hasoman, na maningon humbani toruh ni uhur ma. Ulang ma songon na mamaksa hita hubani, tapi marhitei humbani na mangelek ma hita.

Ganup do hita marsura-sura anggo laho marsuhutan hubani hasoman, andohar jumpah hita na pinindonta. Untuk hal on bagei do cara ibahen hita laho mangelek ase dapot hita ma pinindonta ai. Sada contoh ididah hita: Sada anak na laho mangindo hubani bapani, pala matektek iluh laho marsuhutan ase jumpahsi pinindoni ai.

Naha do nani age hita na laho mangindo hubani Tuhanta anggo sampai tektekan iluh hita laho marsuhutan hubani Tuhanta? Mangindo humbani bulat ni uhur pakon toruh ni uhurta dompak Tuhanta? Sadalan hujin anggo maronjolan hita hubani hata ni Tuhan Jesus bani Mateus 7:7 ai, ijai ihatahon do: "Pindo hanima ma sai bereon-Ni do bannima, pindahi hanima ma sai na jumpahan do hanima, hartuki hanima ma sai na bukaon-Ni do bannima."

Ayat on gabe sada pangarapan na manggoluh hubanta das bani panorang on janah na gabe hatengeran ni uhur hubanta anggo sintong hita laho mangkaporsayai-Si, janah roh hita mangindo hu Bani, sai na balosan-Ni do hita. Lang mintor paulakkon-Ni hita na roh marsuhutan hu Bani. Ai ihatahon do bani Jakobus 5:16 ai margogoh tumang do pangkorhon ni tonggo ni halak parpintor anggo ihabujurhon. Marhiteihon ni tonggonta dalan laho mangindo hu Bani janah ihabujurhon hita marhitei toruh ni uhurta ijai ma hita ibalosi Tuhanta bani na pinangindonta.

Ase anggo ihatengerhon uhurta, Ia do Tuhan na boi mambere pasu-pasu janah unjah laho mambere pasu-pasu-Ni hubanta, ijai ma jumpah hita na pinindonta hu Bani. Halani ai roh ma hita marhasoman bulat ni uhur, janah marhiteihonni haporsayaon ibagas na martoruh ni uhur, pindo hita ma hubani Tuhanta, tenger ma uhurta sai na jumpahan do hita. Itangihon Naibata do tonggonta.

Tonggo: *Ham Tuhan Naibata Bapanami, na marhabangsa i Nagori Atas, na roh do hanami hu lobei-lobei-Mu laho mangindo idop ni uhur pakon haluahonnami hu Bamu. Ibagas toruh ni uhur pakon bulat ni uhurnami do hanami roh hu Bamu, halani ai urupi janah pargogohi Ham ma hanami. Tarimakasih ma bamu Tuhan. Amen.*

HALELUYA NO. 6:8+12

8. O Naibata, Ham do bayak,
sibere hanai on;
Ai Ham do na tongtong layak,
manumpak jolma on.

12. Sai ihirahon Ham hape
bani dunia on;
Bai daging pakon tonduy pe
itongos Ham tongtong.

KUASA NI JESUS

“Ase manowod anjaha marsombah ibagas goran ni Jesus sagala na i Nagori Atas pakon na i atas tanoh on, age na i toruh ni tanoh.”

Pilippi 2:10

Ayat na marpardomuan hubani ayat on ai ma pasal na pataridahkon kuasa ni Naibata, ai ma na tarsurat bani Mateus 28: 18, ihatahon: Domma ondos Bangku kuasa na i Nagori Atas pakon na i tanoh on. Hunjai taridah janah boi artihononta: Sagala siparkuasa na adong i Nagori Atas sonai pakon na adong i tanoh on domma ondos hubani Tuhan Jesus Kristus. Pakon pondok hatahonon sagala hagogohon na adong i dunia on sonai pakon na i Nagori Atas domma ipatunduk Tuhan Jesus Kristus marhitei panghopkopon-Ni.

Sonai homa ipadomu hita hubani ayat na iatas ayatta sadari on (7-9), ijai ihatahon do: Ipalumei do diri-Ni, gabe ipakei rupa jabolon; ilayakkon do Bani sada goran na mangatasi sagala goran.

Humbani ayat-ayat na iatas in, domma tangkas ipatugah ise do Jesus sasintongni banta. Domma ipagijang Naibata Ia, marhitei parpuhoon-Ni, naik hu surga janah hundul i siamun ni Naibata Bapa in, na manggomgomi sagala na adong. Ase marhiteihonni in ihatahon do hubanta: Ase manowod janah marsombah hu Bani do haganup na i Nagori Atas pakon na i atas tanoh on ronsi na i toruh ni tanoh. Tangkas hunjin lang adong kesempatan banta, laho marsombah bani kuasa hagogohon na legan na adong i tanoh on, halani domma ondos haganupan hubani Tuhanta Jesus. Halani ai patut homa akuhononta, ia hagogohon na i tanoh on lang sadiha in marimbang hagogohon ni Naibata. Anggo sonai lang adong dalih-dalih banta atap pe alasan-alasan ase martenger ni uhur hubani na i dunia on hita.

Domu hujin porlu ma homa pareksaonta uhur pakon hadirion bani goluhta ronsi keyakinan humbani na dob in, atap hubani ise do hita marhatengeran. Tapi hata on paingatkon hita, lang adong na legan sobalikkon ni Jesus na gabe sisombahon janah sibalosanta sadokah na mangirikkon-Si. Ai Ia do Raja ni sagala raja janah Tuhan ni sagala tuan. Janah ihatahon do homa: Ia Jesus Kristus sonai nantuari sonai sadari on, sonai do ronsi sadokah ni dokahni (Heber 13:8). Halani ai Tuhan in ma na gabe sisombahonta janah sibalosanta, ai Ia do siparkuasa ronsi simada hagogohon ronsi sadokah ni dokahni.

Tonggo: *Ham Tuhan Jesus Kristus Tuhannami, Ham do tongon simada kuasa pakon hagogohon ronsi sadokah ni dokahni. Halani ai Tuhan, sai pargogohi Ham ma hanami marhiteihon tonduy-Mu. Ase gok hu Bamu hanami tongtong martenger ni uhur, janah Ham tongon gabe siunsagahkononnnami. Amen.*

HALELUYA NO. 79:1+7

1. Jesus Kristus in do Raja,
ipabangkit Naibatanta.
Manggomgomi hajojor,
Manggomgomi hajojor
Janah ganup hajolmaon
ningon Bani do mar Tuhan.
Iakuhon in botul.
Iakuhon in botul.

7. Dihut au sihol marsombah,
sol marolob bai Tuhanta.
Lao mamuji Jesus in,
Lao mamuji Jesus in.
Jesus Kristus in do Raja,
ningon tunduk ganup hita
Mangirikkon Raja in,
Mangirikkon Raja in.

HUJA DO TUJUAN NI GOLUHMU?

“Nasiam sanina, lape huhira, na dob jumpah ahu ai, tapi on do tene: Huhalupahon do na i pudingku, huparayak na i lobeihu.”

Pilippi 3:13

Humbani na sempurna i tanoh on, bani goluh pardagingon, lape ai na gabe ukuran na dear pardomuan i lobei ni Tuhan Naibata na mangirikkon Tuhan Yesus.

Apostel Paulus mangkatahon: Porini pe dong do namin sipangunsagahonkon ibagas daging, anjaha adong halak na legan na mangagan adong sipangunsagahon ibagas daging, ahu buenan (Pil. 3:4) janah ayat 7 ai ihatahon: Paruntungan hinan pe bangku harugion do ia huhira halani Kristus. Artini: Pengalaman, sinadongan, jabatan pakon na legan, aha pe lape ai anggo bani na mangirikkon Tuhan Yesus. Hatahonon ma tene, aha pe lape haganupan na hinorjahon na dob in, ase marimbang na sihol sijaloanta bani ujungni, ai ma haluahon pakon hagoluhan na sadokah ni dokahni. Ase anggo na laho marayakkon Kristus in, atap pe na laho mangirikkon Tuhan Yesus iparnalang ma dirini. Itadingkon do na i pudini, iparayak na ilobei ni ai ma hamonangan na humbani Tuhanta Jesus Kristus, haluahon sisadokahni-dokahni.

Sadalan hujai, boi hatahononta, ia goluh ni halak Kristen na mangirikkon Tuhanta Jesus, tarpausih do ai hubani sada perlombaan na sanggah i tongah dalan na laho marayak hubani garis finish. Ijai ma jumpah hamonangan na dob pinasirsir hinan. Age goluh ni halak Kristen mangkaporsayai Tuhan Jesus Kristus, dong siparayakon atap pe tekad bulat na laho mandapotkon hamonangan ai. Ai ma ianan malas ni uhur i lambung ni Tuhanta. Ase ulang mintor puas uhurta bani na adong sonari ai, tapi sihol ma parayakonta arta na so ra maseda ai. Pakon pondok hatahonon ibagas pardalanan ni goluh ni hita halak Kristen dong do sada situjuan na tertentu, ai ma ase marhasadaon hita ibagas Kristen marhitei holong na hum Bani sandiri. Atap pe hasangapon, habayakon pakon jabatan na dong sonari ibanta aha pe lape ai huhira ninta, ase hasangapon na sihol jaloonta hum Bani. Lang boi gap bani hasangapon ai hita, lang boi gab bani habayakon ai hita, lang gap bani jabatan ai hita, tapi sidearan parayak hita hasangapon i lambung ni Tuhanta, habayakon bani arta na humbani arta na so ra buruk, ai do siparayakonta laho mangirikkon Kristus. Ase anggo domma dong sonin ai ma na saud jumpahan haluahon pakon hagoluhan janah ai ma na saud das hubani garis finish, ai ma i lambung ni Tuhanta simagira.

Tonggo: *Ham Tuhan Naibata Bapanami, sai pargogohi Ham ma hanami bani pardalanan ni pargoluhannami ari-ari na laho mangirikkon Ham, ase ulang sontu gap bani na i tanoh on hansa uhurnami. Tapi sihol ma tong ibagas malas ni uhur hanami laho marayak Ham marhitei na dob binere-Mu hubannami. Amen.*

HALELUYA NO. 333:1-2

- | | |
|---|--|
| 1. Hu surga do tujuankin
sai tong masihol uhurhin,
bai na roh au hu lobei-Mu,
patenger Ham ma uhurhin.
O Tuhan togu tonduyhin,
bai na sonang i lambung-Mu,
ai sai masihol uhurhin
hu surga bai ianan-Mu. | 2. Seng sonang au bai goluhkon,
bai tanoh partangisan on,
sai dompak Ham do uhurhon,
ase boi sonang au tongtong.
O Tuhan togu tonduyhin,
bai na sonang i lambung-Mu,
ai sai masihol uhurhin,
hu surga bai ianan-Mu. |
|---|--|